

四庫全書

集部

欽定四庫全書

成都文類卷五

宋 扈仲榮等 編

詩

寺觀

暮登四安寺鐘樓寄裴十 唐杜甫

暮倚高樓對雪峯  
僧來不語自鳴鐘  
孤城返照紅將斂  
近市浮煙翠且重  
多病獨愁常閒寂  
故人相見未從容

知君苦思緣詩瘦大向交遊萬事慵

題武檐寺西臺詩

唐段文昌

秋天如鏡空樓閣盡玲瓏水暗餘霞外山明落照中鳥  
行看漸遠松韻聽難窮今日登臨地多歡語笑同

同前

唐姚向

開閣錦城中餘閒訪梵宮九層連畫景萬象寫秋空天  
半將身到江長與海通提携出塵土曾是穆清風

同前

唐溫知

桑門煙樹中臺榭造雲空  
眺聽逢秋興篇辭變國風  
坐愁高鳥起笑指遠人同  
始媿才情薄躋攀繼韵窮

同前

唐楊汝士

清淨此道宮層臺復倚空  
偶時三伏外列席九霄中  
平視雲端路高臨樹杪風  
自憐榮末座前日別池籠

同前

唐李敬伯

臺上起涼風乘閑覽歲功  
自隨台席貴盡許羽觴同  
樓殿斜暉照江山極望通  
賦詩思共樂俱得詠時豐

同前

唐姚康

松逕引清風，登臺古寺中。  
江平沙岸白，日下錦川紅。  
疎樹山根淨，深雲鳥跡窮。  
自慚陪末席，便與九霄通。

西蜀淨衆寺松溪八韵兼寄小筆崔處士

唐鄭谷

松因溪得名，溪吹答松聲。  
繚繞能穿寺，幽奇不在城。  
寒烟齋後散，春雨夜中平。  
染岸蒼苔古，翹沙白鳥明。  
澄分僧影瘦，光徹客心清。  
帶梵侵雲響，和鐘擊石鳴。  
淡烹新

茗爽暖泛落花輕此景吟難盡憑君盡入京

聖母山祈雨詩

并序

潘洞

靈池縣東山下有朱真人洞洞北岡嶺連屬  
逾二十里得褚聖女祠化跡尤異民咸事之  
予出宰之次月邑中苦旱於是絜誠薦禱希  
恩於二像之前曾未三日甘雨大澍民欣其  
應式歌且抃仰荷明靈之垂祐作詩以紀之

錦里城東邑高原十六鄉江流分不到天雨降為常

益部

十縣多引江水溉田成為沃壤唯靈池  
疏決不到須俟天雨俗詔之雷鳴田

節及三春後晴

逾兩月強龍乖尋穴蟄魚困入泥藏樹影全虧綠苗姿  
半吐黃耕夫皆慘戚市戶亦蒼茫潛慮寬無雪深疑政  
有傷推恩慙睿主引咎謝虛皇聲折真人宇星奔聖女  
堂先時蠲玉饌陽夜浴蘭湯洞口焚香遠山椒作梵長  
幽誠期必達玄應果旋彰雷振南峯下雲飛北嶺傍聲  
稠喧竹塢勢迫瀉銀潢颼灑連三晝霧霓遍一方稻畦  
煙漠漠蓮沼水泱泱物態涵優渥民情遂樂康洪施周

庶品餘潤浹他疆稔歲還堪待陰功詎可忘明靈何以  
報奮藻紀遺芳

留題郾縣西禪院古調詩 徐仲謀

郾縣七十寺碁布于郊坰景德當道衢寶塔騰青冥其  
間西禪院地勝景物靈何以使索然中有大藏經自從  
沒官來卷帙何零丁府民納其直將遷離梵庭奇哉陳  
氏子覩此而涕零謂寺無九部何以重佛僧如人去五  
臟何以主神形捨財百萬餘贖之俾安寧蘭若皆修飾



貝葉重芳馨，籤函列金玉。堂殿揮丹青，永以鎮福地。實可壯禪扃，命僧開寶藏。煌煌如日星，讀誦香烟裏。音響何泠泠，聞者與見者。如醉而得醒，豈不獲洪福。深遠於滄溟，凡人富金帛，安能延百齡。唯有好善道，聲譽喧雷霆。高吟二百言，長使郡民聽。

集海雲鴻慶院

宋祈

地勝祠仍古，春餘物徧華。山雲時抱石，佛雨不萎花。嶺挾樓梯峻，巖牽殿城斜。淙谿雜環珮，怪蔓走龍蛇。供去聲

坐僧飛鉢香園客戲沙吾游真草草深意在青霞

再游海雲寺作

前人

十里雲邊寺重驅千騎來天形欹野盡江勢讓山回園  
木濃成性樓鐘近殷雷斜陽歸鞅促飛蓋冒輕埃

題信相院默庵

前人

對言方有默因默乃名庵庵留默不遣一物遂為三龜  
掃泥中痕正恐力弗堪自問呵默者了然成妄談

信相院慧燈

范鎮

行樂列蕭寺像殿殿煌煌僧年過九十細話燈燄長方  
憶韶齡時初離父母鄉是時循舊跡晝夜不暫忘自事  
膏火來日就與月將始卒未嘗暗眉髮皆如霜禦風設  
絳紗求福兼異香洪誇本化我我心翻悲傷寒村會績  
女借餘坐如筐陋巷苦志士鑿壁偷隣光太息日已暮  
百結忡忡腸類此事億萬聊書成短章

遊昭覺寺

前人

炎蒸無處避此地忽如寒松砌行無際石房禪自安鴛

鴛秋沼漲蝙蝠晚庭寬登眺見田舍衡茅半不完

淨衆寺新禪院

前人

金地西郊外一來煩慮攄凡逢似仙境鮮不屬僧居岸  
綠見翹鷺溪清無隱魚殘陽已周覽欲去幾躊躇

和閩寺丞海雲寺

前人

春日金田驩且譁始因民俗好紛奢管絃齊奏喧聞野  
鷺鷥高飛不在花雕楹凭時見城郭迴廊行處有煙霞  
方塘靈石從來信不獨當年太守誇

景德中太守任密  
諫獲石得嗣特奏

額院

登崇聖閣

前人

金地環迴半錦城累年斤斧不停聲遠村民舍煙未起  
滿寺僧筵鐘盡鳴

又云  
百院

欄檻高低資眺覽市廛言語尚

分明阿房昔日徒虛語壯麗應虧此畫楹

嚴真觀

呂公弼

卜肆垂簾地依然門徑開沈冥時已往思慕客猶來鳥  
啄虛簷壞狐穿古井摧空餘舊礎石歲歲長春苔

新繁縣顯曜院

梅執

繡地縈回寶勢長，遍遊寧倦徙胡床。  
禪齋不顧幡風影，講席亂飛花雨香。  
苔陣暗連僧榻古，蕉旗低映佛窻涼。  
我來懶上東臺上，目送霜楸感北堂。

妣親松楸在院東一里故云

和韻

王益

梵宇蕭條白日長，苦空譚麈接藤床。  
雲章酷愛休詩麗，蓮柄慵思遠社香。  
石髮雨梳難苑寂，風梭春織鷺山涼。  
劫鹿心火銷平盡，又聽鐘聲下講堂。

留題重光寺羅漢院贈憲上人 梅摯

人盡遊方證佛心  
師心無著外三乘  
連花結社新吟遠  
玉紙抄經舊價騰  
藥杵半和鈴索響  
茶煙輕共衲雲蒸  
我來與話高僧事  
冷笑支公學養鷹

和

王益

曉剃吟髭雪半零  
海窻曾況鉢龍醒  
蚤同西竺能持法  
應笑南僧不會經  
雲氣晝閑侵塵柄  
蘚痕春老上銅瓶  
近來禪觀都無語  
手指餘花滿寺庭

留題清涼院

王益

背倚青峯面枕溪，濡毫新向壁間題。  
善根不撓金蓮合，淨界無塵水月齊。  
會啓茱萸真樂境，花開簷蔔遠香畦。  
因思祖塔嘗遊處，更在龍盤虎踞西。

金陵有龍盤  
虎踞城西偏

和

梅摯

一水明如罨畫溪，清涼佳勝古標題。  
香隨講雨天花爛，聲入幡風地籟齊。  
暫到已能知覺路，縱遊何必理禪畦。  
謝公公退多行樂，五里鳴騶出縣西。



送戴蒙赴成都玉局觀將老焉 蘇軾

拾遺被酒行歌處野梅官柳西郊路聞道華陽版籍中  
至今尚有城南杜我欲歸尋萬里橋水花葉葉暮蕭蕭  
芋魁徑尺誰能盡椹木三年已足燒百歲風狂定何有  
羨君今作我看酒縱未家生執戟郎也應世出埋輪守  
莫欺老病未歸身玉局他年第幾人會待子猷清興發  
還須雪夜去尋君

護國寺詩

張天覺

薄宦區區可歎嗟  
寂寥寒館過村家  
神雖豈向囊中出  
寶劍聊憑醉後誇  
就祿鬼持毛義檄  
讀書空滿惠生車  
掩關不識青春好  
一夜狂風已落花

外大父丞相初登科為雒縣主簿經攝柏窰鎮  
稅官留詩護國寺中令狐監征錄以見寄謹再  
拜追和而記其後  
何麟

傳翁遺墨賸咨嗟  
四海當年尚一家  
大老不為今日用  
小詩徒遣後人誇  
興來思跨巴滇馬  
歸去方乘下澤車

燕麥兔葵僧舍裏何如夢得訪桃花

此篇以和韻故附見不以世次為序

題雙流保國觀古栢

胡宗師

孔明廟前古栢奇此木氣象猶過之  
幹東髣髴煙焰起鐵龍空駕焚一枝  
真人丹誠何所適世傳乘鶴冲天飛  
求詩道士心彌堅試聽一誦工曹詩

清晚坐四天王院

喻汝礪

杳杳天宇涼月墮星亦稀  
朝輝下簷隙遠色開林扉  
寂坐無物後隱几或在斯  
曠焉耳目清擬覺形神歸  
混世

迹若近抱冲心獨微故殿今幾年何人所摹規當時亦  
姱哉作者良已罷快意取一好於身亮何私不知壯觀  
地徒使來者悲坐頃又成昔安知今是非

登正法宮塔

前人

踈雨洗空闊高標插青冥携筇一來登長笑謝所撝清  
芳翔遠江丹氣舒翠岷雪嶺浮夏白海雲亦遠青孤花要  
危芳初篴羅新榮手容五十里颯杳為我陳陵坻潏變  
遷物狀幾屈信念往思自遠感來屢彌臻傷哉千里心

嗟爾百代人胡為軫其德戚戚勞所營吾謂以此辭歸  
來畧下耕

游西臺院暑雪軒觀石鏡

前人

城中苦伊鬱茲軒獨高寒連覺動參差錯畦橫阡眠雪  
嶠政孤峙若與我周旋遠翠浮蕩漾輕鷗下聯軒密竹  
胃幽逕新蒲澹清漣初遊愜餘懷既久幽念攢慨彼泉  
下人灼灼夸令顏忽焉墮榛莽窮窵不可援一鏡空復  
情況乃塊石頑哀哉彼愚子婉孌情所牽差勝茂陵公

更誅方士言

游嚴真觀支機石而壁有記古鼎丹砂茅事

前人

古木共幽意長廊亦蕭如於焉聊逍遙且復散衣裾塵  
慮颯已空道心頗閑舒不知度世人去此歲幾徂云何  
有丹砂尚爾留庭隅支磯亦悠哉誰復訂有無我知此  
公意慨彼元鼎初繼之五鳳間斯民斃刀踞聊欲謝世  
網歎以道自娛抱獨理自會曠懷遺所据初匪逃世人

而世自我踈含默念斯人起我憂患餘

登西樓呈桑彥周

李新

獨自行藏莫倚欄市塵野色不相干是中門戶也羅雀  
何處身心更夢棺錦水背人朝暮去雪山隨我久長寒  
一生著作驚磨滅欲借君家鐵硯看

馮城開元寺留題

張深

本自無涯宦海遊如何杖策訪田疇太平豈是渾無象  
兩兩耕夫話有秋

次韻龐茶使郾縣塔

楊天惠

平生閱巨麗茲塔屹何雄因地如無地平空不礙空寧  
從佛土徙幾歷劫仄窮落趾鷄關北明標玉疊東經營  
本龍象負輓傲煙虹畚築纔驅石觚稜欹倚風妙高分  
絕域峻極倒中嵩已幻花臺巧并規驚嶺從仰窻平月  
殿橫級俯蛟宮未覺諸天隔惟看一氣融恒沙寸眸攝  
多寡片心通瀕洞遺凡界虛踈徹外懷身邊揖先聖眼  
外洗塵霽井直參連壤秦開漢拓功真乘對時出休運



與天崇締構雖人力扶持亦化工長生老西嶠諸葛死  
南隆但了薰香地姑儲氎布筒狂歌留白日醉舞屬冥  
鴻莫漫百年事空成一禿翁

次韻吳帥題保福壁二首

前人

淨瓶猶貯近頒冰拄杖還扶舊醉藤遮莫簪花倩天女  
未妨燕坐折談僧

由來世諦即菩提吾道元東祖自西恰似蒼圓好頭相  
可容破裂作阿梨

玉局

蜀事補亡

宋京

君不見青陽老人飛下天口宣至道朝群仙地中神人  
捧玉局異事秘恠于今傳龜城坤隅地有穴俗說西與  
岷山連嵯峨古觀森偉像老栢慘澹含風煙令威已去  
城郭在人物自改名依然亳州宮庭煥星斗真皇行幸  
祥符年所託得地近京邑此獨隱晦遐方偏安得老人  
洗此心還我澹泊同古先

嚴真

蜀事補亡

前人

君不得莊遵賣卜成都市市中仙隱無人值百錢度日  
復何求猶有沉真見文字不因問着牛女星下士安能  
知姓名雲中鷄犬拔家去舊宅寂寞秋蕪平櫓機石在  
年年長藥鼎空留閉黃壤前時發掘篆籀新明水神丹  
光滉漾金鴈橋邊臺觀存神仙遺事渺難論安得先生  
為我卜俗骨庶可遺天閭

游呪土寺西

蒲瀛

偶到城西寺人言呪土墳夕陽臺半出秋草徑才分地

下無紅粉天邊有碧雲徘徊追往事風急葉紛紛

東臺

前人

城郭層臺迺祇園細路通小亭虛白日老樹足秋風  
閱世年年改傷心處處同黃巢魂在否紅粉亦成空

夏日過莊嚴寺僧索詩為留三絕拉舍弟同賦

晁公休

十里溪橋梵宇新那知陌上漲紅塵老僧苦要題名姓  
不道林泉皆故人

病起支離倚瘦筇  
幅巾芒屨竹陰中  
聞蟬未有驚人句  
且就禪床一榻風

機杼聲中禾稻肥  
疇瓜區芋綠成畦  
田家樂事今如許  
何日邊城息鼓鼙

又

晁公武

松筠窈窕隱禪房  
茗椀熏爐白晝長  
門外塵埃生熱惱  
誰知林下自清涼

笑脫塵衫撲軟紅  
杖藜徙倚水光中  
最憐林葉深深處

遮盡斜陽不礙風

出門散策烟樓樹歸路扶輿月蛺痕十里江村入圖畫  
野橋沙路杳難分

留隱庵老住碧蘆軒

何耕

庵中人不見形兩腳不住以隱名此行有似風過海  
模索不著聞其聲浣花江頭萬僧市抵掌笑談兒輩驚  
一軒碧蘆佛手種霜葉戚戚如詩鳴此間謂是留鳳處  
但恐還作冥鴻征卷衣我亦逐師去分取半庵栖月明

題長松二首

前人

老檜搖風萬壑聲  
梨花着雨四山明  
龕中大士好看客  
排遣雲陰作晚晴

路窮山百轉  
雲擁木千章  
最爾人間世  
蕭然古道場  
龍神森拱衛  
旱魃走祈禳  
地遠齋厨薄  
重來剩裹糧

題龍華佛閣

前人

西川鑿山三大像  
突兀皆在山之湄  
修覺九頂見略盡  
獨此恨未瞻容儀  
竭來勝地了疇昔  
輕軒瘦馬相追隨

百尺金軀信雄傑三乘寶閣何瑰奇然犀不用照幽鬼  
擊鼓自合趨馮夷前人開創願力廣下與舟楫扶傾危  
六月灘濤劇奔吼一分性命爭毫釐篙工落膽行者泣  
彈指乞活天人師人心狎水水多禍佛力在人人不知  
年來蜀產坐朘削夜半有力真能移輶戕大輜去不絕  
綵蠲破浪風揚旗佛慈只作布施想江神將怒將何為

題龍華山寺

前人

傑閣山為佛精廬地布金水涵空闊淨路繞翠微深鳥



下窺齋鉢龍歸識梵音城中塵眯目那得此幽尋

龍華大像蓋冀國夫人所作因成二絕

慧性元從戒定薰百花鐔水流僧裙箇中力量真起絕  
故老尚傳娘子軍

生男箇箇欲如狼婦女軍中氣不揚試問爭功嗔目士  
幾人能敵浣花娘

普通山距府東十數里青州禪師洪杲道場也  
自龍華歸過之棟宇頽落僧徒鄙野良為可惜

是夜雨大作因書所聞所見為長韵

前人

錦城之東山培樓突起伽藍壓山口入門氣象頗不凡  
在昔規模定非苟黃絹碑詞著眼看

侯溥作碑記  
本末頗詳

青州

老衲知名久自披榛徑結茅屋不剪霜鬢散蓬首市門

有女奉巾盥衣袂無花生穢垢

府昌道玉從師落髮人  
或諧之於王建建鞠之

竟無

至今一轉鵲鵲語

蜀人呼鵲鵲為連點七有問師  
者云如何是連點七師云屈指

數不及地上  
無蹤跡故云

散作諸方師子吼祖燈寂寞何人繼宰堵

岩堯惟鬼守法席草長深沒膝僧人屋穿光見斗似聞

占籍多衍沃

此山寺常住田間亦不薄

舍選名鎚振顏汚我來不覺

三歎息眼底盡空諸所有自開麤席掃塵至不寄閑眠

憇奔走夢回中夜雨鳴簷臥聽東風寒入牖明朝散步

轉山脊好語相呼聞野叟抽芒已見麥翻浪搗麩懸知

香滿手湏臾日影散林樾絢練春光被花柳僕夫催歸

屢不應景物殊佳寧忍負出山騎馬叟躊躇乘暇應湏

重載酒

青羊宮

按道闕道成都記載宮乃老子乘青羊降其地今有臺存焉

前人

一再官錦城咫尺望琳宮未始得得來正墮役役中今  
朝弄晴雨策蹇隨春風頗愛意象古停驂小從容縹緲  
百尺臺突起凌半空憑欄俯脩竹決皆明孤鴻信哉神  
仙宅不受塵垢蒙稽首五千言衆妙一以通靜觀萬物  
復豈假九轉功區區立訓詁亦哂河上公癡人慕羽化  
心外求鴻濛要騎白鶴背往訪青羊蹤

暇日與陳楚材游四天王寺見五髻文殊畫像  
于廡下剝落可惜遂以告羅宗約參議遷之正  
法禪院俾長老惠公龕而祠之為詩十四韻書  
其事  
前人

陳侯招我古寺行破椽老瓦煩支撐丹青巨壁置廡下  
大士五髻影華纓旁風上雨塵土集意象落莫無光晶  
近前諦視乃名筆妙處不減本與瓊

成都名畫多張  
南本范瓊之筆

惜

哉此地非所託走卒嘈雜兒童輕西鄰塔廟頗雄偉彌

天老惠新主盟撞鐘擊鼓飯千指分坐豈無三尺樞何  
人堪作不請友參謀行解俱圓明從容試以語二士曰  
此甚易非難成便從遊戲出三昧各借一臂相扶擎騰  
空似赴遠公約散花如入維摩城都人改觀香火肅雨  
淚膜拜爭投誠主人更在好看客永為道伴終生平莫  
言有我不須你留取眉毛遮眼睛

曉詣三井觀

范成大

路轉市聲遠寬閑古城東遙從紅塵來忽入蒼烟叢槿

心傾濃露芽葉翻微風秋陽澹籬落殘暑不必攻野老  
熟睡起日高首如蓬官身騎官馬君應笑龍鐘

遊三井觀

陸游

三井久知名暇日偶一訪棟宇壞欲盡基趾尚闕壯畫  
墻皆國工烟雲儼天仗旌旄亞戈戟佩玉雜弓韞太古  
實傑作筆落九天上吳生名擅世睥睨未肯讓規模遠  
有考意象毫不放最奇老癯僂骨立神愈王石格雖少  
恠用筆亦跌宕兩姝淡蛾眉非復火食狀塵埃久侵蝕

風雨無蓋障好事未易逢寧能久亡恙雍洛劫灰餘妙  
迹盡凋喪斯遊恐難繼佇立增悄愴

飯昭覺寺抵暮乃歸

前人

自墮黃塵每慨然攜兒蕭散亦前緣聊憑方外巾盂淨  
一洗人間七箸羶靜院春風傳浴鼓畫廊晚雨濕茶烟  
潛光寮裏明窻下借我逍遙過十年

飯保福

前人

筵雨雲低未放晴閉門作病憶閑行攝衣文室參耆宿



曳杖長廊喚弟兄飽飯即知吾事了免官初覺此身輕  
歸來更欲誇妻子學煮雲臺芋糝羹

雨中登安福寺塔

俗謂之黑塔

前人

平生喜登高醉眼無疆界北顧極幽并南望際海岱喟  
然撫手歎從古幾成敗英雄如過鳥城郭但遺塊今朝  
上黑塔千里曠無礙忽驚風霆掣坐覺天地晦急雨挾  
龍腥溽暑為摧壞皇天念蟠鬱今宵寄一快那知書生  
狂自倚心眼大更思駐潼關黃河看如帶

遊園覺乾明祥符三院至暮 前人

成都再見春事殘，雖名間官實不閒。  
門前車馬鬧如市，案上文檄高於山。  
有時投罇輒徑出，略似齊客偷秦關。  
日斜僕夫已整駕，願景欲駐愁嘲訕。  
豈知今朝有此樂，放浪一笑開衰顏。  
抽身黃塵烏帽底，得意翠木清泉間。  
寥裳危磴窮犂确，洗耳古澗聽淙潺。  
豈惟頓覺宇宙廣，政爾一散腰脚頑。  
似聞青綵縹緲處，待我歸綴仙官班。  
俊鷹解條即萬里，豈比倦翼方知還。

觀華嚴閣萬僧會齋

前人

拂劍當年氣吐虹  
喑鳴坐覺朔庭空  
早知壯志成癡絕  
悔不藏名萬袖中

過淨名院觸目都似曾到問訊乃非也戲題絕句

李薰

入門彷彿記曾來  
問訊山僧始此回  
却覓舊遊無是處  
只應形似遣人猜

世間形似巧迷人  
總是安排底處真  
縱復非真猶足喜

得來聊寄夢中身

丙寅歲秋再抵長松奉等慈師入城作詩記一

時事

前人

前來送師歸今日迎師去送迎我何勞師乃困行路天  
公將歸誰尤耗數此下土一水禍未忘旱勢復如許小  
民惟怨咨惜莫知其故徑湏憑佛力庶可回帝怒自憐操  
持約一念寄香縷氤氳才上徹雲色暗窻戶數聲跳珠  
急急已忘處所老僧咲謂我水旱要有數德非與天通

造請輒違拒官豈真德人天意遽相與更看鞭雷公滂  
沛逐飛馭定身固如如未始間行住抗走不少停政恐  
塵埃汚傾心太平日十五一風雨官既罷迎送師亦得  
安處我聞低頭謝勤爾相誨語作詩書長松來者尚有  
取

從薛元法會食保福意軒得徑字

前人

春愁醉人心灑面呼不醒出門却入門兀兀度晨暝昨

遊欣有得水鏡謝磨瑩豈惟勝紛華頗復造禪定君看  
青雲士窘步爭捷徑鏗爾詎含悲硜乎方擊磬何曾頃  
刻閑通夕不遑瞑彼應疾此固我亦惡夫倭人生出處  
耳山林與朝廷遲遲岐路間去就湏審訂寧為龜曳涂  
勿作馬旋濘義馭靡容勒風船猶可矻但令尊不空敢  
憚室垂磬更結汗漫遊後期君速聽

十五日同登大慈寺樓得遠字

前人

重樓得雲氣深穩戶牖誰能發闕鍵樓下輪蹄渙散馳  
行人一顧不容返好遊獨是我輩閒褰衣直上相推挽  
層軒危檻倚欲偏更假胡床同息偃西南繁會惟此都  
昔號富饒今已損填城華屋故依然孰為君王愛基本  
茫茫八表聊縱目情知日近長安遠白雲浩蕩飛鳥沒  
玉筍淒涼紅紛晚梁王吹臺得李杜黃公酒壚醉嵇阮  
高峯千載凜莫攀與世相濁徒混混荷衣蕙帶芙蓉裳  
野服猶堪敵華袞去梯熟復共君謀殺馬毀車從此遁

三月四日遊大雲寺分韻得三字佛龕多題名  
韋獨抗段文昌李景讓鄭愚四人者可考王文穆  
呂正閔治平嘉祐間過此亦有筆迹因以詩記

前人

野寺依絕壁化身滿諸龕後前莽難測千億紛相參妙  
斷謝斤斧高樓軼烟嵐旁行栗危棧俯瞰驚深潭歲月浸  
荒老苔蘚爭封函亦有好事者增飭施朱藍經營定自  
圖謀雅奚未暗歛識或可辨上下試與探遠徵固寂寞



近取才二三開元韋庶子剖符劍之南吐嗟檀施開  
至今為美談墨卿少霸窶節旄晚耗耗樂和盛家法國  
垢猶包含鄭氏雖世儒蠻禍竟莫戡舊相粵冀級經從  
各停驂翰林寵則多御史德豈慙數公方盛壯厥聲實  
訐覃紛華竟安在人壽無彭聃彼石尚云朽吾生諒何  
堪華前一笑粲現此優波曇稽首識歸處徑欲投佩簪  
蠢蠢誰汝縛竊食如春蠶被除偶辰已風景清且酣相  
引着勝地佛日況可貪敢誇一醉富庶解憂心悵因歌

以記之放筆書僧菴

遊長松寺宿石門僧舍以石門霜露白為韻得

露字

楊申

疾風吹輕衣駕我雲脊路人間一回首驚絕不敢顧鳥  
投虛無底渺渺不知處蜂窠蟻丘蛭與世同所驚試看  
一蒼莽誰有不平慮尚憐野僧屋佛面荒苔蟲斷崖刺  
呀唵洶洶崩石怒我來得奇觀拄杖叩巖樹青山有驕  
色斯客不能向平生二三子慰我一相遇娟娟松間月

幽夕亦可度夜闌更小語風逼遺響去酌君無多酒繼  
以木蘭露

登安福浮屠以高標跨蒼天為韵得跨字

前人

誰能于虛空千仞擢脩架層梯高寥寥可歷不可跨疑  
從地上踴幻手聊一化飛龍送千柱雷雨天一借巍巍  
大勝妙突兀此其亞道人豈澄觀佛事了間暇指揮三  
百尺斤斧隨叱咤當時奮赤手意闊已遭罵後來見奇

特世眼一驚詫，塹山作平地。海闊梁可駕，哀哉耳目陋。  
未信猶疑嚇，凌高更回首。落日在雲鏤，蒼蒼野浮樹。漢  
漠水分汊，悲涼豪傑窟。野冢埋王伯，百年眼前是。俯仰  
閱榮謝，惟當快飲酒。醉聽風鈴夜。

宿安靜觀

前人

青山轉龍脊，矯首西南天。上有仙人祠，臺殿飛後前。下  
見雲雨興，樹色暗平州。仙人兩黃鵠，一去無歸年。向來  
道上屨人着，幾何錢一朝聞羽化。帳望空流涎，却揮囊


中金瓦礫來投捐巖巖化金碧香火通雲烟人間萬事  
爾旦暮有愚賢而況爭奪場轉手分強姦仙人一回首破  
隴與荒阡紛紛不足道哀此區中緣石泉瀉幽潔意寂  
不肯喧夜聞松風露起坐心寥然

朱真人祠

前人

一濯巖下溪再拜巖中庭清風蕭然來吹我衣上腥仙  
人芙蓉冠乘月下雲軒山空雜佩響靜夜朝百靈似聞  
客欲去小語猶丁寧肅肅上松柏急以兩耳聽寂寥古

壇外但掛斗與星  
天明恐是夢恍惚遺心形  
去飲石上水再讀幽人銘  
青山無行迹霧雨松冥冥



成都文類卷五

欽定四庫全書

集部

成都文類卷六

七

詳校官左中允<sub>臣</sub>瑯五珠

助教<sub>臣</sub>常循覆勘

總校官知縣<sub>臣</sub>繆琪

校對官編修<sub>臣</sub>邱庭澂

謄錄監生<sub>臣</sub>慕湘文



欽定四庫全書

成都文類卷六

宋

扈仲榮等編

詩

陵廟

謁先主廟

唐杜甫

慘澹風雲會乘時各有人力侔分社稷志屈偃經綸復  
漢留長策中原仗老臣雜耕心未已歐血事酸辛霸氣

西南歇雄圖歷數屯錦江元過楚劍閣復通秦舊俗存  
祠廟空山泣鬼神虛簷交鳥道枯木半龍鱗竹送青溪  
月苔移玉座春閭閻兒女換歌舞歲時新絕域歸舟遠  
荒城繫馬頻如何對搖落况乃久風塵孰與關張並功  
臨耿鄧親應天才不小得士契無鄰遲暮堪帷幄飄零  
且釣緡向來憂國淚寂寂洒衣巾

蜀相

前人

丞相祠堂何處尋錦官城外柏森森映階碧草自春色

隔葉黃鸝空好音三顧頻煩天下計兩朝開濟老臣心  
出師未捷身先死長使英雄淚滿襟

蜀先主廟

漢末諡黃牛白腹五銖當復

唐劉禹錫

天下英雄氣千秋尚凜然勢分三足鼎業復五銖錢得  
相能開國生兒不象賢淒涼蜀故妓來舞魏宮前

謁先主廟絕句三首

唐張儼

投順繼皇業并吞勢由已天命屈雄圖誰歌大風起  
得股肱賢明能以奇用兵何事傷客情何人居帝京

雄名垂竹帛荒陵壓阡陌終古更何聞悲風入松栢

武侯廟

唐武少儀

執簡焚香入廟門武侯神像儼如存因機定蜀延衰漢  
以計連吳振弱孫欲盡智能傾僭盜善持忠節輔庸昏  
宣王請戰貽巾幘始見才吞亦氣吞

祠祭畢題臨淮公舊碑

唐楊嗣復

臨淮公武元衡也元和初元衡鎮蜀嗣復為  
節度推官後二十七年嗣復鎮蜀時太和九

年也汝士為東川節度使故相唱和汝士曾  
為蜀帥段文昌掌管也

齋莊修祀事旌旆出郊閨薙草軒墀狹塗墻赭新謀  
猷期作聖風俗奉為神酌酒成坳澤持兵列偶人非才  
膺寵任異代揖芳塵况是平津客碑前淚滿巾

和

唐楊汝士

古栢森然地修嚴蜀相祠一過榮異代三顧盛當時功  
德流何遠馨香薦未衰敬名探國志飾像慰毗思昔謂

從征蓋今聞擁信旗固宜光寵下有淚刻前碑

武侯祠

陳薦

建安綱紀如綫微高光基業春冰危姦豪拔劍將羣盜  
駟龍控虎爭雄雌武侯當日臥南陽韜稜晦角陰營為  
高吟梁甫比管樂胸中造化無人知東吳北魏至強大  
不肯逆德為其師先主歛聞元直語三往咨求當世宜  
勤勤陳說扶漢室慷慨感義許驅馳一說孫權敗曹操  
劉氏遂肇中興基申明號令鼓雷電勗勵士卒獍蛟螭

分留猛將控荆渚翼載昭烈來坤維獻皇邁害首勸進  
應天嗣位開羣疑本謀憑藉蜀富庶養威用作并吞資  
大勲未集昭烈崩遵守顧命如周伊均平賞罰重恩信  
比屋道路皆熙熙七擒孟獲除後患至今南詔崇靈祠

今諸蠻聚落中  
皆立武侯祠

東征直據五丈原欲復咸鎬綏華夷上  
成先帝創業意下副四海蒼生思推忠仗氣順百倍俯  
視敵衆真嬰兒流星落帳芒角惡暴然不起軍如癡仲  
達雖走漢終失人謀不可違天時精魂埋沒已千歲奈

無英傑齊高規朔方男子過廟下秋天寥落霜風悲林  
梢脫葉響颼颼煙頭暮雨寒絲絲妖狐怪兔穴壞壁飢  
鴟餓鵲啼枯枝樵兒敲斲段石苔蘚爛斑裴相碑手  
植勁栢尚蒼翠疑有神靈潛護持眸容昏剝堂廡陋龍  
祠神廟窮珍奇吾心切切慕風概洒淚跼蹐成此詩

武侯廟栢

范鎮

滿葉是清霜培根無沃土恥作秦皇松寧為憑異樹英  
靈自有風蔭蔚長如雨可憐青青姿不知人事古



謁諸葛廟

喻汝礪

孤雲何其高明月不可繫灼灼抱此心與世自涇渭釋  
來從所歡感亂亦虛歎咨惟今之人竊國未云恥七首  
入吾市秋風動燕水區區表與曹等是刺客耳而我於  
其間秉義不敢墜哀音回衡飈清義動幽邃天心固難  
亮吾獨信所履溶溶日間雲漠漠苔點砌飢飈墮蒼瓦  
澹薄公所憇靜然想英姿孤懷亦差尉

過武侯廟

陳古

羣雄角逐自驅除邂逅真龍起畏途材並管蕭非亞匹  
氣吞曹馬直庸奴兩朝冠蓋尊元遠千載風雲屈壯圖  
天欲鼎分終割據可憐憂國竟捐軀

謁江瀆廟

喻汝礪

坤軸東南傾大江日夜注前驅下洛洙餘濤略吳楚任  
勢不期勞得意緣所遇水也初無營神哉亮誰主芳蘭  
沉清華碧藻舒翠縷晨鵠戲野岸春鳬集深渚均是得  
所安而神豈私汝古來幾精魄拾此迷所處淫游不知

還沙村失煙樹而我後千載悠然在江許  
抱耆貴無競矜名忌多取冥冥卷岸風  
淫淫打舡雨舞雪窺洪濤開蘋渡前浦  
再拜謝神况聊復隨所住

題先主廟

晁公遡

天地收霸氣丘原余闕宮野人相指似  
旁有若堂封當時大耳兒甚似隆準公  
夫豈忘故都崎嶇巴蜀中劃然成三分  
正爾阮兩雄武侯抱遺恨秦隴竟莫通  
獨怜晉昌明千載時始逢坐看五胡亂  
蕭條河洛空

拜張忠定公詞二十韻

陸游

張公世外人與蜀偶有緣天將靖蜀亂生公在人間厥  
初大盜興樂禍迭相延天子輟玉食貴臣擁戎旃生殺  
出喜怒死者常差肩公曰此何哉從之吾欺天河流觸  
地軸砥柱屹不遷脅從盡縱捨飛章交帝前上意竟開  
悟至仁勝克殘貴臣不極賞追還黜其權安危關社稷  
豈惟蜀民全後來有阿童握兵事開邊晚策睦州功上  
公珥金蟬勢張不可禦北鄉挑幽燕神京遂丘墟迄今

天步艱時無忠定公孰能折其姦我來拜遺祠喬木含  
蒼煙死者不可作愀然哀涕潛憤切感虜禍慷慨思公  
賢春秋送迎神誰為歌此篇

成都文類卷六

欽定四庫全書

成都文類卷七

宋 扈仲榮等 編

詩

亭館 一

草堂

唐杜甫

昔我去草堂蠻夷塞成都今我歸草堂成都適無虞請  
陳初亂時反覆乃須臾大將赴朝廷羣小起異圖中宵

斬白馬盟歆氣已麓西取邛南兵北斷劍閣隅布衣數十人亦擁專城居其勢不兩大始聞蕃漢殊死卒却倒戈賊臣互相誅焉知肘腋禍自及梟獍徒義士皆痛憤紀綱亂相踰一國寶三公萬人欲為魚唱和作威福孰肯辨無辜眼前列杻械背後吹笙竽談笑行殺戮濺血滿長衢到今用鉞地風雨聞號呼鬼妾與鬼馬色悲充爾娛國家法令在此又足驚吁賤子且奔走三年望東吳弧矢暗江海難為遊五湖不忍竟舍此復來難榛蕪



入門四松在步屨萬竹踈舊天喜我歸低徊入衣裾隣  
舍喜我歸沽酒攜胡蘆大官喜我來遣騎問所須城郭  
喜我來賓客隘村墟天下尚未寧健兒勝厲儒飄飄風  
塵際何地置老夫於時見疣贅骨髓幸未枯飲啄媿殘  
生食薇不敢餘

寄題江外草堂

梓州作寄  
成都故居

前人

我生性放誕難欲逃自然嗜酒愛風竹卜居此林泉遭  
亂到蜀江臥病遣所便誅茅初一畝廣地方連延經營

上元始斷手寶應年敢謀土木麗自覺面勢堅臺亭隨  
高下敞豁當清川雖有會心侶數能問釣船干戈未偃  
息安得酣歌眠蛟龍無定窟黃鵠摩蒼天古來達士志  
寧受外物牽顧惟魯鈍姿豈識悔吝先偶攜老妻去慘  
澹陵風煙事迹無固必幽身愧雙全尚念四小松蔓草  
易拘纏霜骨不甚長永為隣里憐

卜居

前人

浣花流水水西頭主人為卜林塘幽已知出郭少塵事

更有澄江銷客愁  
無數蜻蜓齊上下一雙鸕鶿對沉浮  
東行萬里堪乘興  
須向山陰上小舟

一室

前人

一室他鄉遠

一作老

空林暮景懸  
正愁聞塞笛  
獨立見江

船  
巴蜀來多病  
荆蠻去幾年  
應同王粲宅  
留井峴山前

王十五司馬弟出郭相訪兼遺營茅屋貲

前人

客裏何遷次  
江邊正寂寥  
肯來尋一老  
愁破是今朝  
憂

我營茅棟攜錢過野橋他鄉唯表弟還往莫辭遙

王錄事許修草堂賢不到聊小詒 前人

為嗔王錄事不寄草堂賢昨屬愁春雨能忘欲漏時

草堂即事

前人

荒村建子月獨樹老夫家雪裏江船渡風前徑竹斜寒  
魚依密藻宿鷺起圓沙蜀酒禁愁得無錢何處賒

王十七侍御掄許攜酒重至草堂奉寄此時便  
請邀高三十五使君同到 前人

老夫臥穩朝慵起，白屋寒多暖始開。  
江鶴巧當幽徑浴，鄰雞還過短牆來。  
繡衣屢許攜家醞，皁蓋能忘折野梅。  
戲假霜威促山簡，湏成一醉習池廻。

王竟攜酒高亦同過共用寒字 前人

臥疾荒郊遠通行，小徑難故人能領。  
客攜酒重相看自愧，無鮭菜空煩卸馬鞍。  
移時勸山簡，頭白恐風寒。

水檻遣心二首

前人

去郭軒楹敞，無村眺望賒。  
澄江平少嶂，幽樹晚多花。  
細

雨魚兒出微風燕子斜城中十萬戶此地兩三家  
蜀天常夜雨江檻已朝晴葉潤林塘密衣乾枕席清不  
堪祇老病何得尚浮名淺把涓涓酒深憑送此生

嚴中丞枉駕見過

嚴自東川除西川  
勅令兩川都節制

前人

元戎小隊出郊垌問柳尋花到野亭川合東西瞻使節  
地分南北任流萍扁舟不獨如張翰白帽應兼似管寧  
寂寞江天雲霧裏何入道有少微星

南鄰

前人

錦里先生烏角巾  
園收芋粟不全貧  
慣看賓客兒童喜  
得食階除鳥雀馴  
秋水才深四五尺  
野航恰受兩三人  
白沙翠竹江村暮  
相對柴門月色新

北鄰

前人

明府豈辭滿藏身  
方告勞青錢買野竹  
白幘對江臯  
愛酒晉山簡能詩何水曹  
時來訪老疾步履到蓬蒿

水檻

前人

蒼江多風颭雲雨晝夜飛茅軒駕巨浪焉得不低垂遊  
予久在外門戶無人持高岸尚如谷何傷浮柱歆扶顛  
有勸誠恐貽識者嗤既殊大厦傾可以一木支臨川視  
萬里何必欄檻為人生感故物慷慨有餘悲

江亭

前人

坦腹江亭暖長吟野望時水流心不競雲在意俱遲寂  
寂春將晚欣欣物自私故林歸未得排悶強裁詩

茅屋為秋風所破歌

前人



八月秋高風怒號卷我屋上三重茅飛度江灑江郊  
高者挂骨長林梢下者飄轉沉塘坳南村羣童欺我老  
無力忍能對面為盜賊公然抱茅入竹去唇焦口燥呼  
不得歸來倚杖自歎息俄頃風定雲墨色秋天漠漠向  
昏黑布衾多年冷似鐵嬌兒惡臥踏裏裂牀牀屋漏無  
乾處雨脚如麻未斷絕自經喪亂少睡眠長夜沾濕何  
由徹安得廣廈千萬間大庇天下寒士俱歡顏風雨不  
動安如山嗚呼何時眼前突兀見此屋吾廬獨破受凍

死亦足

院中晚晴懷西郭茅舍

前人

幕府秋風日夜清  
澹雲疎雨過高城  
葉心朱實看時落  
階面青苔先自生  
復有樓臺銜景暮  
不勞鐘鼓報新晴  
浣花溪裏花饒笑  
肯信吾兼吏隱名

舍弟占歸草堂檢校聊示此詩 前人

久客應吾道  
相隨爾獨來  
孰知江路近  
頻為草堂迴  
鵝鴨宜長數  
柴荆莫浪開  
東林竹影薄  
臘月更須栽

營屋

前人

我有陰江竹能令朱夏寒陰通積水內高入浮雲端甚  
疑鬼物憑不顧翦伐殘東偏若面勢戶牖可永安愛惜  
已六載茲辰去千竿蕭蕭見白日洶洶開奔湍度堂匪  
華麗養拙異考槃草茅雖難葺衰疾亦少寬洗然順所  
適此足代加餐寂無斤斧響庶遂憩息權

奉酬嚴公寄題野亭之作

前人

拾遺曾奏數行書懶性從來水竹居奉引濫騎沙苑馬

幽棲真釣錦江魚，謝安不倦登臨費。  
阮籍焉知禮法疎，枉沐旌麾出城府。  
草茅無徑欲教鋤。

堂成

前人

背郭堂成蔭白茅，綠江路熟俯青郊。  
楹林礙日吟風葉，籠竹和煙滴露梢。  
暫止飛鳥將數子，頻來語燕定新巢。  
旁人錯比揚雄宅，嬾惰無心作解嘲。

西郊

前人

時出碧雞坊，西郊向草堂。  
市橋官柳細，江路野梅香。  
傍

架齊書帙看題檢藥囊無人競來往踈懶意何長

田舍

前人

田舍清江曲柴門古道傍草深迷市井地僻嬾衣裳  
柳枝枝弱枇杷樹樹香鷓鴣西日照曬翅滿漁梁

懷錦水居止二首

前人

軍旅西征僻風塵戰伐多猶聞蜀父老不忘舜謳歌  
天際終難立柴門豈重過朝朝巫峽水遠遠錦江波  
萬里橋南宅百花潭北莊層軒皆面水老樹飽經霜雪

嶺界天白錦城曛日黃惜哉形勝地回首一茫茫

嚴公仲夏枉駕草堂兼攜酒饌 前人

竹裏行厨洗玉盤花邊立馬簇金鞍非關使者徵求急  
自識將軍禮數寬百年地僻柴門迥五月江深草閣寒  
看弄漁舟移白日老農何有罄交歡

過南鄰朱山人水亭

前人

相近竹參差相過人不知幽花歌滿樹小水細通池歸  
客村非遠殘樽席更移看君多道氣從此數追隨

琴臺

前人

茂陵多病後尚愛卓文君  
酒肆人間世琴臺日暮雲  
野花留寶曆蔓草見羅裙  
歸鳳求皇意寥寥不復聞

同羣公秋登琴臺

唐高適

古跡使人感琴臺空寂寥  
靜然顧遺塵千載如昨朝  
臨眺自茲始羣賢久相邀  
德與形神高孰知天地遙  
四時何倏忽六月鳴秋蜩  
萬象歸白帝平川橫赤霄  
猶是對夏伏幾時有涼飈  
燕雀滿簷楹鴻鵠搏扶搖  
物性各自

得我心在漁樵兀然還復醉尚握樽中瓢

寄題杜二錦江野亭

唐嚴武

漫向江頭把釣竿懶眠沙草愛風湍莫倚善題鸚鵡賦

何須不着鷁鷁冠

侍中

腹中書籍幽時曠肘後醫方靜處

看興發會能馳駿馬終須重到使君灘

清陰館種楠

蔣堂

手植梗楠二千樹時當慶厯五年春還期莫道空歸去  
留得清陰與後人



東齋

前人

守土無留事，休居有靜齋。  
文纔化僻陋，術未迨乖崖。  
古帙書參畫，秋陰竹間槐。  
西人安枕外，聊此息筋骸。

府衙新書堂

并序

張俞

號略楊保臣，由將作屬官，隨侍于益府新闢書堂。延二儒者，日講文藝，俞善其作，不類乎亭觀之事，因作新書堂詩以贈之。

志士營道日，築室養賢名。  
鋤荒出幽邃，掃室廻虛明。  
山

嶽凌牆壁谿塘瀉窗楹蘭蘅露景晚松桂秋風生琴瑟  
閑古奏樽壘湛寒清默意馳萬象遊心覽八絃羣經牙  
粲粲百氏紛營營禮樂立制作文章懸準程唐虞化已  
遠周禮道尚行師友得正士詘論無俗聲邪哆不可入  
紛華固難傾修辭力工巧勵學逾農耕天爵既自後人  
文取其榮元侯方作鎮列士爭獻誠學校溢都市謳吟  
遍黎氓寧同稷下議飽食談縱橫

題琴臺

田況

西漢文章世所知  
相如閔麗冠當時  
游人不賞凌雲賦  
只說琴臺是故基

揚子雲墨池

即草玄所

宋祁

宅廢經池在人亡  
墨溜乾蟾蜍兼滴  
破科斗共書殘  
蠹罷芸猶翠  
蒸餘竹自寒  
它揚無可問  
撫物費長歎

集江瀆池亭

前人

五月追涼地  
滄江刺素漣  
林煙昏岸日  
樓影壓池天  
篠密工迷徑  
荷歌巧避船  
機忘更何事  
魚鳥亦留連

江瀆亭

前人

一輦掀翅壓溪隅  
吏事初閒此宴居  
斷岸有時通略約  
輕風盡日戰拚摺  
雲鴻送目揮絃後  
客板看山拄頰餘  
笑碧蒲青來更數  
江人多識使君旗

夏日江瀆亭小飲

前人

飛檻枕溪光  
歡言客徧觴  
暫雲消樹影  
驟雨發荷香  
辛  
白橙蠶熟庖  
刀膾縷長蘋  
風如有意  
盈社借浮涼

司馬相如琴臺

前人

故臺千古恨猶對舊家山  
半夜驚凰去它年駟馬還死  
憂封禪晚生愛茂陵間惟有飄飄氣仍存天地間

錦亭晚矚

前人

長夏宜高明緩帶散煩窘憑軒一起然目與天共盡山  
從雲端現日就林外隱風來草樹披煙生井閤近自公  
況多暇冲臆無留蘊即此可宴居何須事游軫

高亭駐眺招宮苑張端臣

前人

蜀天向臘寒未極倚檻綿睇亭臯分一萍團紅江上日

數蓋淡白樓頭雲杯中竹葉與誰舉  
笛裏梅花那忍聞  
願君枉步數相勞他時離緒徒紛紛

和浣花亭

葛琳

琳啟伏覩運使學士留紀浣花亭詩謹齋沐  
繼和拜呈俯揆蕪淺卑衷無任震惕之至

井絡西南區成都號佳麗錦城十里外物景居然異傍

繁浣花溪中開布金地杜宅歸遺址任祠載經祀

按蜀記梵

安寺乃杜甫舊宅在浣花去城十里大歷中節度使崔  
寧妻任氏亦居之後舍為寺人為立廟於其中每歲四

月十九凡三日  
衆邀樂於此

自昔歲一遊有亭久摧廢將期汎舟會

先此留旌騎弗基矧肯構後人莫予嗣冠蓋或戾止風  
雨亡所庇我公至之初行樂徇人意柅車集賓組幕天  
陳燕器苟弗謀高明胡為草媮散鳩工度材用奢儉求  
中制舉從縣官給下靡秋毫費巍然大厦成甚於折枝  
易藩條息偃暇時律清和際落成及休辰夙駕忻重詣  
羣嬉逐使轂雜處同蠡市棟宇美可觀席筵陳有次芳  
樽既罷撤綵舲爰登憩夾岸布緹幣中流喧鼓吹沂泂

煙靄間禽鳥共翔戲都人與士女疊足連帷被弄珠疑  
漢曲浮觴均洛禊晡晡日將暮熙熙衆皆醉況入武陵  
源却返塵寰世自是畢遨賞始復專民事農耕士就學  
商販工居肆蜀邦生齒繁衣食良難匱三時急耕播寸  
壤無遺棄茲焉俾暇逸所以慰勤瘁上賴天子心慎重  
坤維寄既擇邇臣德來秉諸侯瑞且命太史賢出攬  
澄清轡第務廣教育孜孜布仁惠匪圖亟聚斂規規  
奉邦計和氣斯涵濡羣生皆茂遂乃躋富壽域共樂



升平治不才備屬僚罔補公家利廕宇幸焉依雅聲  
慙善繼願比召南篇永歌棠蔽芾

題琴臺

王素

長卿才調世間無拘監君前奏子虛自有賦詞能諷諫  
不須更著茂陵書

同前

呂公弼

煙樹重城側琴臺千古餘早為梁苑客晚向茂陵居賦  
給尚書筆歸乘使者車清風覲舊隱長日聳鄉閭

同前

韓絳

車騎擁客安在哉綺琴何事有遺臺當時卒困臨邛辱  
異日寧知諭蜀才園令官閒多病後茂陵書奏侈心開  
文章光燄留千古陳迹猶存尚可哀

琴心事不足傳而誰名此臺使不泯

其文章足以覆過獨無遺跡如墨池者良可哀也

九河張公二月二日始游江以集觀者子華韓  
公創樂俗亭為駐車登舟之所抃輒爾賦成一  
首

趙抃

長橋東畔輓朱輪  
畫棟雕欄錦水濱  
子美浮槎傳大句  
乖崖秉檟看芳春  
酒樽汎汎留佳客  
鼓吹喧喧樂遠人  
夾岸香風十餘里  
晚隨和氣入城闌

韓公嘗遊於此故卒章及之

游琴臺墨池

吳中復

尋春景物乍晴暄  
連月餘寒花未繁  
天子琴臺餘古寺  
揚雄墨沼但空園  
池邊宿草交加綠  
林外鳴禽相關喧  
秀麥漸漸搖暖日  
幾重蒼翠滿郊原

西園十詠

并序

前人

成都西國樓榭亭池庵洞最勝者凡十所又  
於其間絕勝者西樓賞皓月眺岷山衆熙臨  
清池濯錦水志殊土之產有方物快蔭樾之  
風有竹洞雜花異卉四時遞開翠幹茂林蔽  
映軒戶足以會賓僚資燕息因題十詠以見  
登覽之盛也

西樓

信美他鄉地登臨有故樓清風破大暑明月轉高秋朝

暮岷山秀東西錦水流賓朋逢好景把酒為遲留

衆熙亭

亭枕方塘上軒開四照新花涵清露曉風卷綠波春日  
暖眠汀鷺荷翻躍錦鱗熙熙遊宴地行樂慰西人

竹洞

陰森過百步屈曲鎖莓苔翠色寒無改清風時自來葉  
籠蒼玉幹路入碧雲堆吏散無公事支筇到幾回

方物亭

草木蟲魚部披尋自古無飛沉天產異生植土風殊物  
色随心匠形容記續圖虛亭玩真意浩思滿江湖

翠柏亭

衆木墜黃葉皴皮抱翠枝自然根性在不為雪霜移靈  
潤承多露清陰貫四時婆娑歲寒意每到坐遲遲

圓通庵

坐對圓通境陶然勝靜齋觀空無物我扣寂外形骸燕  
坐埋遺照虛名莫疚懷人間憂樂地所喪甚山崖

琴壇

閒道參  
政所建

瀟灑琴壇上賢侯養道情無今亦無古求意不求聲林  
邃風初靜雲收月乍明拂絃成一弄塵思浩然清

流杯亭

結客乘公暇流觴逐浩歌亂峯晴倒影曲水宛迴波小  
海逢元已蘭亭記永和西州行樂事應比晉賢多

喬栢亭

古木西園勝亭延上客過色無花卉妬堅為雪霜多幹

育千年秀根含一氣和明堂求厚棟可得老巖阿

錦亭

簾幕臨彫檻窗踈照爛霞園林初過雨風日猛催花香  
入遊人袖紅堆刺史家四時俱好景終不似春華

華陽縣求瘼亭

范鎮

繁劇尚餘暇幽亭昔創成廉聲風竹遠政事月池清卷  
箔客常至臨階禽不驚當年危坐意求瘼在高情

題曹山人墅居

前人



溪接浣花饒勝致山人高隱在其中一江綠竹喧天沸  
爭及松篁半日風

留題張少愚屋壁

前人

高隱郾城下平時仍往還門開值冠蓋簾卷為江山沛  
雨人間待片雲天外閒泥封詔不起朝夕奉慈顏

西園辨蘭亭

呂大防

手種叢蘭對小亭辛勤為訪正嘉名終身服佩騷人宅  
舉國傳香楚子城削玉紫芽凌臘雪貫珠紅露綴春英

若非郢客相開市幾被方言誤一生

和

李大臨

沙石香叢葉葉青却因聲誤得蟬名騷人佩處惟荆渚  
識者知來徧蜀城消得作亭滋九畹便當入室異羣英  
非逢至鑒分明說汨没人間過此生

和

李之純

綠葉纖長間紫莖蜀人未始以蘭名有時只恠香盈室  
此日方傳譽滿城恩意和風揚馥郁光榮灝露滴清英

庭階若不逢精覽何異深林靜處生

萬里橋西有僧居曰聖果後瀨錦江有脩竹數  
千竿僧辯作亭於竹中予與諸公自橋乘舟泝  
流過之因名亭曰萬里蓋取其發源注海與橋  
名同而實異因作小詩識之 呂大防

萬里橋西萬里亭錦江春漲與堤平  
拏舟直入脩篁裏  
坐聽風湍徹骨清

蓮司園亭詩

并序

章綵

成都轉運司園亭蓋偽蜀時權臣故宅也清  
曠幽靜隨處皆有可樂者輒為十詩粗記領  
略以備他日遺忘庶幾讀其詩足以省憶髣  
髴云爾

西園

古木鬱參天蒼苔下封路幽花無時歇醜石終朝踞水  
竹散清潤煙雲變晨暮何必憶山林直有山林趣

玉谿堂

堂因水得名方沼當其後漪瀾蕩穰桶窗戶挹花柳蟲  
魚不避人鷗鷺若相友半枕夏簟涼此樂亦奚有

雪峯樓

曾構壓池塘不僭亦不偏影浮綠水靜寒逗雪山色撫  
檻接脩竹連簷引蒼柏注目望長安無奈濃雲隔

海棠軒

珍葩寄幽島正對孤軒植優柔自俯仰紅綠若組織春  
酣晴日曛坐久濃香遍池面淨可監朝霞罩澄碧

月臺

蜀地饒夜雨輕陰多蔽天見月月無幾築臺待嬋娟高  
凝桂影近俯視雲屋連顧盼已塵外欲挹瑤宮仙

翠錦亭

梗楠百尺餘排列拱簷際畏日自成陰隆冬寧減翠虛  
曠得寂理懶癖資濃睡誰知官府中獲此冲寞味

潺玉亭

傍砌醺小渠回環是流水石螭吐珠涎清響醒人耳風

微竹影碎月皎波光起颼爽無塵囂靜適心所喜

茅庵

竹間構圓菴所向自蕭灑珍禽弄巧舌宛是居山野嘿  
坐見真心萬緣盡虛假勿陋尋尺地茲焉息意馬

水閣

架木浮水中略約通孤島扶疎花影倒鱗刺跳魚小風  
月所得多經營信云巧隱几寂無人朱蘭萃幽鳥

小亭

花邊二小亭雙跨清渠上規摹雖甚隘幽僻良可賞幸  
依佳木陰未羨大廈廣不足延賞朋攜筇常獨往

同前

許將

高牙負北郭芳園路西轉鳥鳴戀故木蘭茁歸新畹

質夫

新得真蘭植之坐延花景深行倚筇枝穩翳然想林水會心不

在遠

朱堂俯玉谿玉谿清且幽從公暫息偃撫景空夷猶浮  
雲冠負島白日回方流祗此有光碧何必崑崙洲



重樓起城陰乘高望西極列峯橫青天飛雪千里積疑  
是空素山冬夏海中白莫恠頻東向上有思歸客  
海棠冠蜀花此軒花尤冠紅雲簇藥細綠水照葉嫩倚  
粧宮粉聚疊綺霞光散雨淚點春風應懷上林怨  
蜀地山四維益州平如掌累臺鬱臨風坐看月宵上稍  
出叢木末始發衆籟爽茲焉覽遊日一攬天地廣  
闢千竇溜長甯窳空埃靜修林密總翠盡得錦城景雲  
舒青青色風散搔搔影未為夜行人共此晝夜永

引泉注清渠潺潺漱寒玉側出閭風遲驟驚江雨速飛  
瀨乍揚白樛木細涵綠晝夜聲不止肯効楚人哭

茨茅以為菴環顧蕭然虛內樂苟自足容文即有余旁  
依修竹密上翳青松踈勿言此中陋中有君子居

飛閣出方池脩曲見空莽保臨花塢近平覺春波長反  
景澄余暉夕陰帶浮爽從容觀魚樂不減遊壕上

扁然溝上亭左右相映帶修栴列翠幄長松偃高蓋地  
褊景逾寬處約志彌泰誰知坐嘯間心遊萬物外

同前

豐稷

仙花二十四境遠難遍探錦城史君園雅與雲洞參廻  
光試一覽紫翠絕西南池映金波淨花霑玉露甘  
一水從何來應是崑山頂醞成綠玉池虛堂逗清影公  
退冷然賞了非心外境魚泳陽光動鳥啼春晝永

雪峯在何許樓倚青霄端每來注心目不覺生羽翰終  
籍好風力雲散銀闕攢隻履西歸客應笑空倚欄

文錦初動機晨霞欲敷照香傳雪樓濃影落玉谿倒字

美不能賦春工一何妙維有賞心人相逢祇寒笑

石印魚在屏屏透星入角廼知明月光日用人不覺陟  
此百尺臺余念坐消剥洞曉弦望機仙丹茲可學

簷外列修木凜凜正人氣有德必有文爛兮五色備豈  
同天韻花弄春張繡被湏信輪囷財堪為萬乘器

金穀計浩穰山水志濶契晴空倚危樓獨對西山雪曾  
中浩氣充物外囂塵絕無何重一吟遠岫窗中列

高軒瞰方池澄波隔鎖窗中島植奇花紫鱗躍錦江水

府集羣仙紅雲羃翠幃畫圖入禁庭榮耀知無雙

內瑞使蜀

畫圖以進

俗流嗜喧卑世才務高潔築臺僅踰尋清夜延明月四垂天幕低千里蟾光發美人抒奇才裁賦何清絕

森森棟梁材駢空翥鸞鳳危亭構其間曾不礙榱桷簷陰織翠紋砌溜諧清弄此間宜畫眠一枕華胥夢

回環引細泉泉聲漱簷底美哉智者心清通樂

去聲流水

琤琮戛鳴球淅瀝泛綠綺塵慮無由得何須洗雙耳

結茅作禪菴不卑亦不廣地占官府雄盤基才袤丈几  
席供燕閒松筠坐蕭爽座有逍遙公虛中息塵想

小閣連雪峯憑欄意幽玩紅接海棠洲綠對簷簷岸有  
時開鑿疊波影侵几案何須架長虹然後冲雲漢

養源在西山如玉抱精白引之落錦渠歷耳不可擇風  
雨雜鳴球珠璣寫雲液恰似偃谿聲醒悟迷途客

覆以潔白茅環以琅玕竹天籟旁鼓笙月沼對鋪玉借  
問清坐翁此外更何欲笑指博山鑪香飛柏子綠

長虹臥松江一蓐航大河豈如此安穩無復畏風波幽  
香萃花島魚藻旨且多徙倚小欄曲月色透薜蘿

東西對孤騫杖履可幽歇容光日月來矧此明四徹鱗  
木張幄翠蜚泉飛玉潔徃徃得意時宛在廣寒闕

同前

孫闕名

外臺富園池茲焉甲西南異花間棠梅良木森梗楠飄  
飄壺中仙疊疊物外談聯毫賦詩題刻石留翠龕

華堂殿聲去方池雅名題玉谿南榮翠樾陰北望花島低

時聞細泉鳴間或幽鳥啼深宜世外人冥坐窺天倪  
蕭森玉谿南小亭屹相向使華雙輶車禪境二方丈固  
將物理齊室隘志自廣松竹周四簷足以備幽賞

同前

吳師孟

十紀權臣第修城外臺宅喬木不知秋名花數逾百遠  
如山林幽近與塵埃隔惠政裕一方民猶以為窄  
華構枕方塘使臺寂佳致二色真楠材輪奐極精緻花  
木四面圍如立復如侍一道仰澄清此是澄清地



西北有高樓梁棟雲常起簷牙挂連蜷欄影搖清泚爽  
氣雪山來一瞬極千里但欲攄遠懷無憂可銷弭

花淑對高軒如用丹青影錦水一箇紅玉臺千面笑松  
莖兩翠幄常護東西照子細看韶妍方知化工妙

雅意待蟾光煩襟期爽快無雲點太清遠覽周色界天  
光淨琉璃露下真沆瀣勸渠諗後人宜葺不宜壞

東閣治臺政西堂備燕飲介於二堂間華構饒花品紅  
紫鎮長春四時如活錦公暇一繩牀上有通中枕

至人泉石心但耳便絲竹醒渠逗清冷朝夕淙寒玉試  
聽自然聲不減雲璈曲却返倒聞機五音常自足

結茅為園屋環堵不開牖齋居如鴈堂廣長纔六肘深  
藏子猷竹不植陶潛柳勿起滅定心宴坐空諸有

形制似方橋島岸相連屬春和逗涼颺晝影浮淨綠佳  
人羅韞輕花時相步續澄瀾忽生暈下有雙鳬浴

尺水走庭除花木皆周匝雙亭正相值僅能容一榻公  
餘時獨來隱几聊噓嗒典謁或通名東榮有賓閣

同前

楊怡

池臺密相望曾是故侯宅賞心知幾人喬木已百尺低  
花拂烏帽古蘚駁蒼石欲問昔豪華秋風掃無迹

虛堂已深窈那復要營室使君寂無事閉閣臥終日臨  
池狎清泚養竹聽簫瑟不為省春耕軺車肯輕出

脩脩樓下竹瀲灩竹間水樓高雖不見清響長在耳晨  
光露西崦積玉照窗紙崑閨亦何人當從跨金鯉

花如窈窕人宛在水中沚當軒有餘妍終日玩芳蘼池

清藻墜枝波動魚爭葉錦帳想含春歸心浩然起  
嘉木密交陰月夕苦蒼翳高臺出林杪遠目望天際不  
厭清露寒祗恐輕雲蔽可但少陵翁能思研仙桂

峩峩碧油幢轟轟羽葆蓋燕居不廢嚴環竦布亭外稷  
陰生晝寒微吹發天籟隱几對凝香衣冠嗒如蛻

使君漱流心官府未始忘亭下玉谿水撲碎白玉璫清  
耳不待洗高懷自滄浪安得援瑤琴寫此聲琅琅

緝茅如蝸廬容膝纔一丈規圓無四隅空廓含萬象繩

牀每宴坐不與物俯仰惟許歲寒君虛心環几杖

小閣平池陽危橋屬花嶼杖履樂幽閒龜魚蔭深阻刻  
柱記新漲弄水滌煩暑物我久相忘珍禽近入語

方亭惟四柱對峙花竹間下有雪嶺水淙流日潺潺宛  
如雙綵舸纜向春波灣欲起江湖心而奈風濤艱

同前

杜敏求

潭潭刺史府宛在城市中誰知園亭勝似與山林同幽  
鳥語晴晝好花嬌春風物情如有待賦詠屬詩翁

堂前對花柳堂後瞰沼沚賢有堂中人虛心湛如水煩暑當風窗中宵隱月几作詩紀勝槩詩與水清泚


西山最高峯積雪連四季登樓試寓目八國有故地烽候雖久息武經思豫備文饒昔籌邊公意今無媿

東風開百花獨有海棠勝猩血染珠璣點綴枝條賸日暖錦段新雨餘燕脂凝何待東閣梅方能動詩興

明從海上來皎皎入我牖何如登高臺對月把尊酒問月月無言浩歌詩千首幾人知此樂此樂公所有

材大難為用，嘗誇古柏篇。亭前老榿楠，黛色亦參天。夏  
暑借清陰，秋籟得自然。有如愛庭楸，朝暮東西偏。  
林亭幽且深，砌下玉谿水。淙琤環珮聲，曉夕清心耳。使  
君性所樂，愛玩不少已。方持利物心，默坐窮至理。  
深深竹林下，圓菴最幽僻。高懷本恬曠，野趣坐閒適。衆  
人奔名徒，浮世縈物役。豈知菴中樂，道勝心自逸。  
方池導流水，橫閣上尋丈。晨曦夜月光，罩影相滉漾。游  
魚時出沒，飛鷗亦下上。終朝倚欄干，不見有風浪。

二亭雖云小好在泉石間白石自齒齒清泉亦潺潺公  
府無留事暫來寄餘閒筇杖烏角巾一日幾往還



成都文類卷七